

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10), a u vezi sa Odlukom o proglašenju stanja nesreće uzrokovano pojavom koronavirusa (COVID-19) na području Federacije BiH, V. broj: 408/2020 od 16.03.2020. godine, na prijedlog Ureda premijera, Vlada Zeničko-dobojskog kantona, na 6. vanrednoj sjednici, održanoj dana 21.03.2020. godine, d o n o s i

ZAKLJUČAK

o načinu rada u kantonalnim ministarstvima, kantonalnim upravama, kantonalnim upravnim organizacijama, stručnim, tehničkim i drugim službama Zeničko-dobojskog kantona

I.

U cilju sprječavanja širenja bolesti izazvane koronavirusom (COVID-19), rad u kantonalnim ministarstvima, kantonalnim upravama, kantonalnim upravnim organizacijama, stručnim, tehničkim i drugim službama Zeničko-dobojskog kantona (u daljem tekstu: organi uprave) će biti organizovan u skladu sa odlukom rukovodioca, kojom će uposlenici, počev od dana 23.03.2020. godine, biti upućeni na godišnji odmor, vodeći računa da bude obezbijeđeno obavljanje poslova onih osoba čiji je rad neophodan za nesmetano funkcionisanje organa.

II.

Rukovodioci organa iz tačke I. ovog zaključka, dužni su uposlenike sa dijagnosticiranim hroničnim oboljenjima, kao i trudnice, počev od 23.03.2020. godine, uputiti na korištenje preostalog godišnjeg odmora iz 2019. godine, odnosno na korištenje prvog dijela godišnjeg odmora iz 2020. godine, u trajanju od najmanje 12 (dvanaest) radnih dana, ukoliko su uposlenici već iskoristili godišnji odmor iz 2019. godine.

III.

Radno vrijeme uposlenika u organima uprave, zbog obustave javnog prijevoza u Federaciji Bosne i Hercegovine, od ponedjeljka 23.03.2020. godine, utvrđuje se u vremenu od 9,00 sati do 14,00 sati.

IV.

Rukovodioci organa uprave dužni su organizovati normalno funkcionisanje i rad, kroz preraspodjelu poslova i radnih zadataka.

Zadužuju se rukovodioci da organizuju poslove uz prisustvo što manjeg broja uposlenika na radnom mjestu u isto vrijeme, a tamo gdje priroda posla i proces rada zahtijeva, organizuju dežurstva u skladu sa stvarnim potrebama.

Ukoliko je to moguće, potrebno je organizovati rad uposlenika od kuće, te pratiti i koordinirati njihov rad. Odobrenje za rad od kuće, organizaciju i nadzor posla daje i vrši rukovodilac. Svi radnici i rukovodioci su obavezni biti dostupni 24/7 (na telefon), bez obzira na skraćeno radno vrijeme.

V.

Stranke koje komuniciraju sa kantonalnim organima uprave, kantonalnim upravnim organizacijama i stručnim i drugim službama, upućene su da, u skladu s preventivnim mjerama koje su na snazi, komunikaciju obavljaju isključivo putem telefona i elektronski putem (e-mail), da sve podneske šalju putem pošte, te da izbjegavaju neposredan dolazak u prostorije organa.

VI.

Pisarnica u sjedištu organa uprave vrše prijem pošte od 9,00 sati do 13,00 sati, uz kontrolu ulaska (jedno po jedno), sa odgovarajućom sanitarno-epidemiološkom zaštitom uposlenika.

VII.

Neophodno je da organi uprave:

- otkazu sve sastanke u prostorijama organa uprave, osim onih koji imaju karakter hitnosti, uz prethodno odobrenje nadležnog rukovodioca;
- za izvršavanje redovnih zadataka i konsultacije umjesto ličnih kontakata koriste telefone, video-konferencije i internet kao zamjena za sastanke;
- po potrebi obezbijede dodatna sredstva za dezinfekciju i sanitarno-epidemiološku zaštitu radnika.

VIII.

Zadužuje se Služba za zajedničke poslove da u segmentu sanitarno-epidemiološke zaštite poduzme sljedeće:

- izvrši nabavku sredstava za dezinfekciju koja će se koristiti za čišćenje službenih prostorija Vlade, kao i sredstava za dezinfekciju ruku, rukavice i maske za potrebe higijeničarki i uposlenika koji rade u Ministarstvima
- svakih 15 (petnaest) dana organizuje izvršavanje dezinfekcije kompletnog prostora u kojima su smještena ministarstva do okončanja nastale epidemiološke situacije, a svakodnevno vršiti čišćenje cjelokupnog prostora i dezinfekciju radnih površina.

IX.

Navedene mjere važe do okončanja epidemiološke situacije izazvane koronavirusom (COVID-19).

X.

Ovaj zaključak se ne primjenjuje na Ministarstvo unutrašnjih poslova, u kojem će ministar u skladu sa potrebama i situacijom u vezi proglašenja stanja nesreće uzrokovano pojavom koronavirusa, poduzeti odgovarajuće mjere i organizovati rad uposlenika Ministarstva unutrašnjih poslova.

XI.

Zaključak stupa na snagu danom donošenja.

Broj: 02-40-4562/20

Datum, 21.03.2020. godine

Z e n i c a

DOSTAVLJENO:

1x Ured premijera,

1x Svim ministarstvima i drugim tijelima kantonalne uprave,

1x Služba za zajedničke poslove,

1x web stranica Zeničko-dobojskog kantona,

1x a/a.

